

四庫全書

子部

欽定四庫全書

子部

冊府元龜卷二百七十四至
六

詳校官中書_臣王鵬

員外郎_臣牛稔文覆勘

總校官庶吉士_臣何思鈞

校對官學正_臣湯垣

校對官助教_臣羅萬選

謄錄監生_臣楊兆豐

謄錄監生_臣彭良箴

欽定四庫全書

冊府元龜卷二百七十四

宋 王欽若等 撰

宗室部

友愛 辨德

畏慎 悔過

友愛

夫因心則友詩所美也教人以悌禮之經也若乃鍾天倫之愛厚同氣之親人無間言家敦輯睦故曰友于兄弟施於有政矧夫肺腑之親本枝之重而能協比式好

敦叙著稱以貴介之英修布衣之行長惠幼順發於天性字孤撫弱篤於人倫棠棣繇是騰芳葛藟無所興刺也

漢陽城侯德爲宗正家產過百萬則以振昆弟

振舉救也與賑

同

楚王紆尤慈篤早失母同廬弟原鄉侯平尚幼紆親自鞠養常與共卧起飲食及成人未嘗離左右病卒紆哭泣歐血數月亦歿

春陵侯敞謙儉好義盡推父時金寶財產與昆弟荊州

刺史上其義行拜廬江都尉

南陽郡是荊州所管故刺史上其行義也侯等助祭

明堂以例益戶二百敞以有行義拜為廬江都尉

後漢趙孝王良字次伯光武之叔父也平帝時舉孝廉為蕭令光武兄弟少孤良撫循甚篤

北海王睦靖王興子既嗣王爵悉推財產與諸弟雖王車服珍寶非列侯制皆以為分然後隨以金帛贖之

濟南王香篤行好經書初叔父篤有罪不得封西平昌

侯昱坐法失侯香乃上書分爵土封篤子九昱子嵩皆
為列侯

東海王臻性敦厚有恩常分租秩賑給諸父昆弟國相
籍褒具以狀聞順帝美之詔曰東海王臻和睦兄弟恤
養孤弱至孝純備仁義兼宏朕甚嘉焉今加臻封五千
戶

魏陳王植黃初四年封雍丘王其年朝京師是時待遇
諸國法峻任城王彰暴薨諸王既懷友于之痛植及白

馬王彪還國欲同路東歸以叙隔闊之思而監國使者
不聽

晉臨川獻王郁孝武世其兄會稽王世子道生初以無
禮失旨郁數勸以敬慎之道道生不納郁為之涕泣簡
文帝深器異之

宋晉熙王昺文帝之子孝武孝建三年昺兄竟陵王誕
反伏誅前廢帝即位昺為征北將軍徐州刺史道經廣
陵上表曰竊聞淮南中實眷求遺緒楚英流殛愛存丘

墓並難結兩臣義開二主法雖事斷禮或情申伏見故賊
劉誕稱戈犯節自貽逆命膏斧嬰戮在憲已彰但尋屬
忝皇枝位叨列辟而一以罪終魂骸莫赦生均宗籍死
同匹豎族寔委雜封樹不修今歲月逾邁愆流釁徃踐
境興懷感事傷目陛下繼明升運咸與維新大德方臨
哀矜未及夫藥布哭市義犯雷霆田叔鉗赭志於夷戮
況在天倫何獨無感伏願稽若前準降申丹志乞薄改
編拊微表窳窳則朽骨知榮窮泉識荷臨紙哽慟辭不

自宣詔曰征北表如此省之慨然誕及妻女並可以庶人禮葬并置守衛

南齊豫章王疑以弟長沙王晃蓄私仗武帝將糺以法疑于御前稽首流涕曰晃罪誠不足宥陛下當憶先朝念白象白象晃小字也帝亦垂泣又武陵王暕亦疑弟也

暕數以言語忤武帝武帝幸疑東田宴諸王獨不召暕疑曰風景殊美今日甚憶武陵帝乃呼之暕善射屢發

命中顧謂四座曰手何如帝神色甚恠疑曰阿五

暕高帝弟

五子常日不爾今可謂仰藉天威帝意乃釋也

竟陵王子良初送文惠太子葬夾石先是豫章王葬金牛山子良臨送望祖礪山悲嘆曰北瞻吾叔前望吾兄死而有知請葬茲地既薨遂葬焉

曲江公遙欣子幾字德玄年十歲能屬文早孤有弟九人並皆穉小幾恩愛篤睦聞於朝野

梁始興王憺為荊州刺史同母兄安成康王秀偏孤憺尤篤愛自天監中嘗以所得俸中分與秀秀稱心受之

亦不辭多也昆弟之睦當世歸之愴天監十四年為都督荆湘雍寧梁南北秦七州諸軍事鎮右將軍荊州刺史秀將之雍州薨於道愴聞哀自投于地席藁哭泣不飲食者數日傾財產賻送部伍大小皆取足馬天下稱其悌

後魏中山王英子熙少有文才而輕躁英深慮非保家主欲廢之而立第四子畧為世子宗議不聽畧又固請乃止

臨淮王昌弟孚為冀州刺史後為葛榮所陷為榮所執兄祐為防城都督兄子子禮為錄事參軍榮欲先害子禮孚請先死以贖子禮叩頭流血乃捨之又大集將士議其死事孚兄弟各誣已引過爭相為死又州人張孟都潘紹等數百人皆叩頭就法請活使君榮曰此魏之誠臣義士也凡同禁五百人皆得免

北齊安德王延宗兄蘭陵王死妃鄭氏以頸珠施佛廣寧王使贖之延宗手書以諫而淚滿紙河間王死延宗哭之淚赤

河間王孝琬兄河南王之死諸王在宮內莫敢舉聲唯孝琬大哭而出

後周安化公深性仁愛從弟神舉神慶幼孤深撫訓之義均同氣世以此稱焉

隋觀德王雄周時為邠國公高祖受禪封廣平王以邠公別封一子雄請封弟士貴朝廷許之

唐襄邑王神符淮安王通弟也幼孤事兄以友悌聞

韓王元嘉與其弟靈夔甚相友愛兄弟集見如布衣之禮

信安郡王禕少有志尚撫繼母所生弟祗等以友愛稱
褒信郡王璆許王素節子為宗正卿友弟聰敏宗子中
有一善無不薦拔故宗枝居省闈者多璆之所舉

辨惠

傳曰生而知之詩云克岐克嶷皆幼惠早成之謂也乃
有席天宗之貴出帝者之胄流光憑厚蘊靈毓德肇自
童丱迥彰聰悟強記默識經目而不忘知幾會理發言
而可述藻翰適發知畧超邁挺老成之美有先見之明

孝心夙著政術懸解嗜好絕俗才辯超世用能馳徽名

于宗屏聳偉望於王室隆肺腑之懿增本支之睦者也

周王孫滿魯僖公三十三年春秦師過周北門左右免

冑而下

王城之北門冑兜鑿兵車非大將御者在中故左右下御不下

超乘者三百乘

王孫滿尚幼觀之言于王曰秦師輕而無禮必敗

謂過天子

門不卷甲束兵超乘示勇輕則寡謀無禮則脫入險而脫又不能謀

能無敗乎

後秦師果為晉師敗于微

漢陽城侯德楚元王交之後有智畧少時數言事召見

甘泉宮武帝謂之千里駒

言若駿馬可致千里也
年齒幼少故謂之駒

魏陳思王植字子建年十歲餘誦讀詩論及辭賦數十

萬言善屬文

鄧哀王冲字倉舒少聰察岐嶷生五六歲智意所及有
若成人之智時吳曾致巨象太祖欲知其斤重訪之羣
下咸莫能出其理冲曰置象大船之上而刻其水痕所
至稱物以載之則較可知矣太祖大悅即施行焉

晉扶風武王駿字子臧宣帝子幼聰慧年五六歲能

書疏諷誦經籍見者竒之齊王立駿年八歲為散騎常侍侍講焉

武陵王澹宣帝孫有罪徙遼東其子禧年五歲不肯隨去曰要當為父求還無為俱徙陳訴歷年然後得還

武陵王遵年十二右將軍桓伊嘗詣遵遵曰門何為通桓氏左右曰伊與桓溫踈宗相見無嫌遵曰我聞人姓木邊便欲殺之况諸桓乎繇是少稱聰惠

齊獻王攸字大猷文帝子少而岐嶷

臨川獻王郁字深仁簡文帝子幼而敏惠其兄道生初以無禮失旨郁數勸以敬慎之道道生不納郁為之涕

泣帝深器重之

年十七而薨

宋南譙王義宣子恢字景度既嫡長少而辯惠義宣甚愛重之年十一拜南譙王世子

南齊臨川王映少而警悟美言笑喜容止

江夏王鋒十歲便能屬文

宜都王銓年十歲時與吉景曜商畧先言徃行左右誤

排柵溜屏風倒壓其背顏色不異言談無輟亦不顧視
巴陵王昭胄初為竟陵世子舅表彖監吳興郡事坐過
用祿錢免官付東冶昭胄時年八歲見武帝而形容慘
悴帝問其故昭胄流涕曰臣舅負罪今在尚方臣母悲
泣不食已積日臣所以不寧帝曰特為兒赦之既而帝
遊孫陵望東冶曰中有一好貴囚數日與朝臣幸冶
履行庫藏因宴飲賜囚徒酒肉勅見彖與語明日釋之
曲江公遙欣年七歲出齋時有一左右小兒善彈飛鳥

無不應弦墜落遙欣曰樂事多端何急彈此鳥自空中
翔飛何關人事無趣殺此生亦復不急左右感其言遂
不復彈鳥時少年通好此事所在遂止

竟陵王子良幼聰敏武帝為贛縣時與裴后不諧遣船
送后還都已登路子良時年少在庭前不悅帝謂曰汝
何不讀書子良曰孀今何處何用讀書帝異之即召后
還縣

南康縣侯子恪豫章王嶷第二子年十二和從兄司徒

竟陵王高松賦衛將軍王儉見而竒之

子恪弟寧都侯子顯幼聰惠疑異之愛過諸子

梁鄱陽忠烈王恢字宏達太祖子幼聰穎年七歲能通
孝經論語義發擿無所遺

吳平侯景字子怡高祖從父弟八歲居喪以毀聞既長
好學才辯能斷

定襄侯祗美風儀幼有令譽

南康簡王績高祖子為南徐州刺史時年七歲王者有

受貨洗改解書長史王僧孺弗之覺績見而輒詰之便
即時首服衆咸歎其聰警

績子會理字長才少聰惠好文史年十一而孤特為高
祖所愛

尋陽王大心簡文子年十三出為郢州刺史雖不親州
務發言每合于理衆皆驚服

建平王大球簡文子性明惠夙成初侯景圍京城高祖
素歸心釋教每發誓願嘗云若有衆生應受諸苦悉請

身代當時大球年甫七歲聞而驚謂母曰官家尚爾兒
安敢辭乃六時禮佛亦云凡有衆生應受諸苦報悉大
球代受其早慧如此

西陽王大均簡文子年七歲高祖嘗問讀何書對曰學
詩因命諷誦音韻清雅高祖因賜王羲之書一卷

陳衡陽獻王昌高祖子為吳興太守時年十六昌雅性
聰辨明習政事高祖遣陳郡謝哲濟陽蔡景歷輔昌為
郡又遣吳郡杜之偉授昌以經書一覽便誦明於義理

剖析如流

晉安王伯恭字肅之宣帝子初為平東將軍吳郡大守
置佐史時伯恭年十餘歲留心政事官曹治理

南平王嶷字承嶽後主第二子方正有器局年數歲風
采舉動有若成人

後魏任城王澄子順字子和九歲師事樂安陳豐書王
羲之小學篇數千言晝夜誦之旬有五曰一皆通徹豐奇之
白澄曰豐十五從師迄白首耳目所經未見此比江夏

黃童不得無雙也澄笑曰藍田生玉何容不爾

彭城王勰字彥和獻文帝子少而岐嶷姿性不羣

江陽王繼子奐字景詰少而機警尤為父寵愛

清河王懌字宣文幼而敏惠孝文愛之

元文遙昭成皇帝六世孫也敏惠夙成濟陰王暉業每云此子王佐才也暉業嘗大會賓客有人將何遜集初入雒諸賢皆贊賞之河間邢邵試命文遙誦之幾遍可得文遙一覽便誦時年十歲濟陰王曰我家千里馬今

定如何邢云此殆古未有

北齊永安王浚字定樂神武第三子八歲時問於博士
盧景裕曰祭神如神在為有神耶無神耶對曰有神浚
曰當云祭神神在何煩如字景裕不能答

彭城王浹字子深神武第五子元象二年拜通直散騎
常侍封長樂郡公博士韓毅教浹書見浹筆迹未工戲
浹曰五郎書畫如此忽為常侍開國今日後宜更用心
浹正色答曰昔甘羅幼為秦相未聞能書凡人惟論才

具何如豈必動誇筆迹博士當今能者何爲不作三公
時年蓋八歲矣毅甚慙

清河王岳子勣字敬德幼聰敏美風儀以仁孝聞為高
祖所愛年七歲襲爵

後周齊煬王憲字毗賀突太祖第五子性通敏有度量
雖在童龀而神彩嶷然世宗初除益州總管益寧巴瀘
等二十四州諸軍事益州刺史進封齊國公邑萬戶初
平蜀之後太祖以其形勝之地不欲使宿將居之諸子

之中欲有推擇遍問高祖已下誰能此行並未及對而
憲先請太祖曰刺史當撫衆治人非爾所及以年授者
當歸爾兄憲曰才用有殊不關大小試而無効甘受面
欺太祖悅之以憲年幼未之遣也世宗追遵先旨故有
此授時年十六

憲子貴字乾福少聰敏涉獵經史尤便騎射始讀孝經
便謂人曰讀此一經足為立身之本天和四年始十歲
封安定郡公邑一千五百戶

東平公神舉太祖族子早歲而孤有夙成之量族兄安
化公深器異之

宇文深字奴干太祖族子性鯁直有器局年數歲便累
石為營伍併折草作旗旌布置行列皆有軍陣之勢父
永遇見之乃大喜曰汝自然知此於後必為名將

宋獻公震字彌俄突幼而敏達年十歲誦孝經論語毛
詩尚書

隋趙王杲煬帝子年七歲聰令帝有所製詞賦杲多能

誦之

唐衛王玄霸高祖第三子也幼而聰敏言詞辯惠有異常兒

許王素節高宗子六歲封雍王能日誦古詩賦五百餘言受學於學士徐齊暉精勤不倦帝甚愛之

永王璘玄宗子少聰敏好學

壽王瑁玄宗子開元十五年封永王以年幼小不於殿前引謝瑁纔八歲請從諸兄行玄宗異而許之殿庭拜

伏蹈舞深合禮法

晉高祖幼子重睿少帝嗣位初拜開封尹以年幼未出閣命左散騎常侍邊尉知府事時少帝戲謂重睿曰已降銜命使臣有何例物待之重睿曰例物出於內庫臣何憂焉少帝許之

畏慎

中庸曰戒慎乎其所不覩恐懼乎其所不聞蓋耳目之未能思言動之未必中是故夕惕若厲君子所以無咎日

嚴祗肅大夫所以有家若乃聯輝本支席寵天族表頴
悟於異稟挺淑哲於令器爵祿之重冠絕於等倫車服
之崇輝映於表著復有權參機要職分內外紀律斯在
休戚攸繫而能處貴思降居安慮危裁損儀衛之容因
專賞罰之柄凡所興事必遵旨意至有罷去娛玩謝絕
還徃特避盛勢靡求虛稱語默兢慄出處端莊協克已
之方得率性之理茲所謂淑人君子歟

後漢清河孝王慶章帝子母曰宋貴人慶初立為皇太

子後被譖廢慶時雖幼而知避嫌畏禍言不及宋氏帝
更憐之勅皇后令衣服與太子齊等太子特親愛慶入
則同室出則同輿慶小心孝恭自以廢黜尤畏事慎法
每朝謁陵廟常夜分嚴裝衣冠待明約勅官屬不得與
諸王車騎競驅

北海敬王睦性謙恭好士千里結交自名儒宿德莫不
造門繇是聲價益廣永平中法憲頗峻睦乃謝絕賓客
放心音樂然性好讀書常為愛翫歲終遣中大夫奉璧朝

賀名而謂之曰朝廷設問寡人大夫將何辭以對使者
曰大王忠孝慈仁敬賢樂士臣雖螻蟻敢不以實睦曰
吁子危我哉此乃孤幼時進趣之行也

一云是吾幼時
狂蠢之行也

大夫其對以孤襲爵以來志意衰惰聲色是娛犬馬是
好使者受命而行

魏中山恭王衮少好學每兄弟游娛衮獨覃思經史文
學防輔相與言曰受詔察公舉錯有過當奏及有善亦
宜以聞不可匿其美也遂共表稱陳衮美衮聞之大驚

懼責讓文學曰修身自守常人之行耳而諸君乃以上
聞是適所以增其負累也且如有善何患不聞而遽如
是是非益我者其戒慎如此

晉安平獻王孚武帝時為太宰父子位極人臣子孫咸
居大官出則旌旗節鉞入則貂蟬袞冕公族之寵未始
有也享年九十然而夙夜謙恭常有履冰之懼元會詔
孚輿車上殿帝親奉觴上壽如家人禮又給以雲母輦
青蓋車孚雖見尊寵不以為榮常有憂色

宋臨川王義慶少善騎乘及長以世路艱難不復跨馬南齊豫章王嶷武帝時為侍中先是宋元嘉世諸王入齋閣得白服帟帽見人主自比以來此事一斷帝與嶷同生相友睦宮內曲宴許依元嘉嶷固辭啓自陳曰臣自還朝便省儀刀捉刀左右十餘亦省唯郊外遠行或復暫有入殿亦省服身今所牽仗二俠轂二白直共七八十人事無大小臣必欲上啓伏度聖心脫未委曲或有言其多少不附事實仰希即賜垂勅又啓揚州刺史舊有六

白領合扇二白拂臣脫以為疑不審此當云何行園苑
中乘輦出籬門外乘輦鳴角皆相仍如此非止於帶神
州者未審此當云何方有行來不可失衷帝答曰儀刀
捉刀不應省也俠轂白直乃可共百四五十以還正是
耳亦不曾聞人道此吾自不使諸王無仗况復汝耶在
私園苑中乘此非疑郊外鳴角及合扇并拂先乃有不復
施用此來甚久凡在鎮自異還京師先廣州乃立鼓吹
交部遂有輦事隨時而改亦復有可得依舊者汝若有

疑可與王儉諸人量衷但令人臣之儀無失便行也又
啓曰臣拙知自處闇於疑訪常見素姓扶詔或著布屨
不意為異臣在西朝拜王儀飾悉依宋武陵事例有二
鄭扇仍此下都脫不為疑小兒奴子並青布袴衫臣
齋中亦有一人意謂外庶所服不疑與羊車相類曲荷
慈旨今悉改易臣昔在邊鎮不無羽衛自歸朝以來便
相分遣俠轂白直格置三百許人臣頃所引不過一百
常謂京師諸王不煩牽仗若郊外遠行此所不論有仗

者非臣一人所以不容方幅啓省又因王儉備宣下情
臣出入榮顯禮容優恭第宇華曠事乖素約雖宋之遺
製恩處有在猶深非服之慙威衛之請仰希曲炤帝答
曰傳詔臺家人耳不足涉嫌鄣扇吾識及以來未見故
有勅耳小兒奴子本非嫌也吾有所聞豈容不勅汝知
令致物議耶吾已有勅汝一人不省俠輟但牽之吾昨
不通仗事儉已道吾即令答不煩有此啓須閒言自更
一二又啓曰違遠侍宴將踰一紀憂苦間之始得開顏

近頻侍座不勝悲喜沾飲過量實欲仰示恩狎令自下
知見以杜遊塵陛下留恩子弟此情何異外物政自強
生間節聲其厚薄伏度或未上簡臣前在東田承恩過
醉實思歎徃秋之謗故言啓至切亦令羣物聞之伏願
已始此心前侍幸順之宅臣依常乘車至仗後監伺不
能示臣可否便互競啓間云臣逼突黃屋麾旒如欲相中
推此用意亦何容易仰賴慈明即賜垂勅不爾臣終不
知闇貽此累比日禁斷整密此自常理外聲乃云起臣

在華林輒捉御刀因此更嚴度情推理必不容爾為復
上啓知耳但風塵易至和會實難伏願猶憶臣石頭所啓無
生間縫此閒侍無次畧附茹亮口宣臣由來華素已具上
簡每欲存衷意慮不周或有非常且臣五十之年為翫
幾時為此亦復不能以理內自剝北第舊邸本自甚華
臣改修正而已小小製置已自抑簡往歲收合得少雜材
並蒙賜故板啓榮內許作小眠齋始欲成就皆補接
為辦無乖格製要是檉柏之華一時新淨東府又

有齋亦為華屋而臣頓有二處住止下情竊所未安訊
訪東宮玄圃乃有柏屋製甚古拙內中無此齋臣乃欲
壞取以奉太子非但失之於前且補接既多不可見移
亦恐外物或為異論不審可有垂許送東府齋理否臣
公家住止率爾可安臣之今啟實無意識亦無言者太子
亦不知臣有此屋政以東宮無而臣自處之體不宜爾
爾所啟蒙允臣便當敢成第屋安之不疑陛下若不怡
體臣心便當永廢不修臣自謂今啟非但是自處宜然

實為微臣往事伏願必垂降許伏見以諸王舉貨屢降
嚴旨少拙營生已應上簡府州郡邸舍非臣私有今巨
細所資皆是公潤臣私累不少未知將來罷州之後或
當不能不試學營覓以自贍連年惡疾餘顧影單回無
事畜聚唯逐手為樂耳帝荅曰如亮今啓汝所懷及見
別紙汝勞疾亦復那得不動何意為作煩長啓事凡諸
番勅此意可尋當不闕汝一人也宜有勅事吾亦必道
頃見汝自更委悉書不欲多及屋事慎勿強厝此意白

澤亦當不解何意爾

江夏王鋒明帝輔政時藩邸危懼江祐嘗謂王晏曰江夏王有才行亦善能匿迹以琴道授羊景之著名而江夏掩能於世非七絃而已百氏亦復如之鋒聞嘆曰江祐遂復為混沌畫眉欲益弊耳寡人聲酒是耽狗馬是好豈復有一毫於平生哉當時以為話言常忽忽不樂著脩柏賦以見志

河東王鈇建武初為散騎常侍鎮軍將軍置兵佐建武

之世高武子孫憂危鉉朝見常鞠躬俯俸不敢平行直
視

梁南平王偉子靜何敬容欲以女妻之靜忌其太盛拒
而不納時論服焉

南郡王大連與兄大臨並從高祖征朱方高祖問曰汝
等習騎否對曰臣等未奉詔不敢輒習勅各給馬試之
後梁宜都郡王大圜簡文帝子侯景之亂歸江陵時元
帝多忌大圜恐讒愬生焉乃屏絕人事門客左右不過

三兩人不妄遊狎兄弟之間上牋而已嘗以讀詩禮書
易為事

後魏廣平文貞王匡景穆帝孫為洺州刺史嘗忤茹皓
懼為所害廉慎自修甚有聲績

北齊蘭陵王長恭在定陽其屬尉相願謂曰王既受朝
寄何得如此貪殘長恭未答相願曰豈不繇芒山大捷
恐以威武見忌欲自穢乎長恭曰然相願曰朝廷若忌
於此犯便當行罰求福反以速禍長恭泣下前膝請以

安身術相願曰王前既有勲今復告捷威聲大重宜屬疾
在家勿預事長恭然其言未能退及江淮寇擾恐復為
將嘆曰我昔面腫今何不發自是有疾不療

後周代異王達為荊州刺史所管澧州刺史蔡澤黷貨
被訟賊狀分明達以其世著勲庸不可加戮若曲法貸
之又非奉上之體乃令所司精加按劾密表奏之事竟
得釋終亦不言其處事周慎如此

隋蔡王智積父景王昔高祖龍潛時景王與高祖不睦

其太妃尉氏又與獨孤皇后不相諧以是智積常懷危懼每自貶損高祖知其若是亦哀憐之人或勸智積治產業者智積曰昔平原露朽財帛苦其多也幸無可露何更營乎有五男止教讀論語孝經而已亦不令交通賓客或問其故智積答曰卿非知我者其意恐兒子有才能以致禍也開皇二十年徵還京第無他職任闔門自守非朝覲不出煬帝即位滕王綸以讒構得罪高陽公智明亦以交遊奪爵智積愈懼大業七年授弘農太

守委政寮佐清淨自居

悔過

蓋崇高莫大於富貴而晏安斯為之醜毒若夫貴而思
降富而無驕乃良士之吉德也其或憑藉威寵熏灼勢
望未嘗知其憂懼寧復畏於盛湍溺於因習徇乎耳目
自非大雅明哲上智不羣者又孰能無過哉乃有克已
引咎悼心追悔折節改行銜媿沒齒春秋傳曰人孰無
過過而能改善莫大焉易所謂不遠而復斯可尚也矣

漢梁孝王文帝子也時鄒陽為上客羊勝公孫詭欲使
王求為漢嗣王又嘗上書願賜容車之地徑至長樂宮
自使梁國士衆築作甬道朝太后爰盎等皆建以為不

可

建謂
立議

天子不許梁王怒令人刺殺盎帝疑梁殺之使

者冠蓋相望責梁王梁王始與勝詭有謀陽爭以為不
可故見讒枚先生嚴夫子皆不敢諫

先生枚乘
夫子嚴忌

及梁事

敗勝詭死孝王恐誅迺思陽言深辭謝之初孝王怒下
陽吏將殺之陽客游以讒見禽恐死而負繫迺從獄中

上書書奏孝王孝王立出之卒為上客

膠東康王寄以孝景中二年立淮南王謀反時寄微聞

其事私作兵車鏃矢

樓車也所以看敵國營壘之虛實也又一說兵車止謂戰車耳鏃矢

大鏃之矢今所謂兵箭者也

戰守備備淮南之起及吏治淮南事辭出之

辭語所連出其事

寄於帝最親

寄母王夫人即王后之妹於上為從母故寄於兄弟之中又更

親也此下有恒山王云天子為最親其義亦同

意自傷發疾而死不敢置後

東平王宇事太后內不相得元帝遣使奉璽書勅諭之

宇慙懼因使者頓首謝死罪願洒心自改後又殺姬胸

臚有司奏請逮捕有詔削樊亢父二縣後三年天子乃

詔有司曰蓋聞仁以親親古之道也前東平王有闕

謂闕

過失也

有司請廢朕不忍又請削朕不敢專惟王之至親

未嘗忘於心今聞王改行自新尊脩經術親近仁人非法
之求不以奸吏朕甚嘉焉傳不云乎朝過夕改君子與
之其復前所削縣如故

後漢梁節王暢少貴驕頗不遵法度又聽從官下忌乳
母王禮等諂媚言王當為天子暢心喜與相應答永元

五年豫州刺史梁相舉奏不道考訊不服有司請徵詣
廷尉詔獄和帝不許有司重奏除暢國徙九真帝不忍
但削成武單父二縣暢忘懼上疏辭謝曰臣天性狂愚
生在深宮長養傅母之手信惑左右之言及至歸國不
知防禁從官侍史利臣財物熒惑臣暢無所昭見心悸自
悔無所復及自謂當即時伏顯誅魂魄去身分歸黃泉不意
陛下聖德枉法曲平不聽有司曲平曲法中
恩平處其罪橫貸赦臣
戰慄連月未敢自安上念以負先帝而令陛下為臣收

汙天下

汙惡也天下以帝敕王為惡故言收惡天下也

誠無氣以息筋骨不相

連臣暢知大貸不可再得自誓束身約妻子不敢復出入失繩墨不敢復有所橫費租入有餘乞裁食睢陽穀孰虞蒙寧陵五縣還餘所食四縣臣暢小妻三十七人其無子者願還本家自選擇謹勅奴婢二百人其餘所受虎賁官騎及諸工技鼓吹蒼頭奴婢兵弩廐馬皆上還本署臣暢以骨肉近親亂聖化汙清流既得生活誠無心面目以凶惡復居大宮食大國張官屬藏什物願陞

下加大恩開臣自悔之門假臣小善之路令天下知臣蒙恩得去死就生頗能自悔臣以公卿所奏臣罪惡詔書常置於前晝夜讀誦臣小人貪見明時不能即時自引惟陛下哀臣令得喘息漏刻若不聽許臣實無顏以久生下入黃泉無以見先帝此誠臣至心臣欲多還所受恐天恩不聽許節量所留於臣暢饒足詔報曰朕惟王至親之屬淳淑之美傅相不良不能防邪至今有司紛紜有言今王深思悔過端自克責朕惻然傷之志匪

繇于咎在彼小人一日克己復禮天下歸仁王其安心
靜意茂率休德易不云乎一謙而四益小有言終吉彊
食自愛暢固讓章數上卒不許

魏陳思王植任性而行不自彫勵飲酒不節嘗乘車行
馳道中開司馬門出太祖大怒植內不自安及曹仁為
關侯所圍太祖以植為南中郎將行征虜將軍欲遣救
仁呼有所勅戒植醉不能受命文帝即位植與諸侯並
就國黃初二年監國謁者灌均希指奏植醉酒悖慢劫

脅使者有司請治罪帝以太后故貶爵安鄉侯其年改
封郵城侯三年立為郵城王四年徙封雍丘王其年朝
京都上疏曰臣自抱釁歸藩刻肌刻骨追思罪戾晝分而食
夜分而寢誠以天網不可重離聖恩難可再恃竊感相
鼠之篇無禮過死之義形影相弔五情愧赧以罪棄生
則為古賢夕改之勸忍活苟全則犯詩人胡顏之譏伏
惟陛下德象天地恩隆父母施暢春風澤如時雨是以
不別荆棘者慶雲之惠也七子均養者尸鳩之仁也舍

罪責功者明君之舉也矜愚愛能者慈父之恩也是以
愚臣徘徊於恩澤而不能自棄者也前奉詔書臣等絕
朝心離志絕自分黃耆無復執圭之望不圖聖詔猥垂
齒召至止之日馳心輦轂僻處西館未奉闕庭踊躍之
懷瞻望反仄謹拜表獻詩二篇文帝嘉其辭義優詔荅
勉之

中山恭王袞明帝青龍中來朝犯京師禁為有司所奏
削縣袞畏懼戒勅官屬愈謹帝嘉其意二年復所削縣

樂陵王茂性傲狠無寵於太祖文帝太和元年徙封聊城公其年為王詔曰聊城公茂少不閑禮教長不務善道先帝以為古之立諸侯也皆命賢者故姬姓有未為侯者是以獨不王茂太皇太后數以為言如聞茂頃來少知悔昔之非合封茂為聊城王

晉司馬彪字紹統高陽王睦之長子也出後宣帝弟敏少篤學不倦然好色薄行為睦所責故不得為嗣雖名出繼實廢之也彪繇此不交人事而專精學習故得博

覽羣籍終其綴集之務

宋彭城王義康輔政十餘年素無學術闇于大體長史
劉斌等以朋黨伏誅義康出鎮豫章帝遣沙門釋惠琳
視之義康曰弟子有還理不惠琳曰恨公不讀數百卷
書後以范曄謀反事免為庶人徙安城因讀書見淮南
厲王長事廢書嘆曰前代乃有此我得罪為宜

南齊豫章王疑後房千餘人潁川荀丕獻書於疑極言
其失疑咨嗟良久為書答之為之減遣

梁蕭昱字子真高祖從父弟也少而狂狷不拘禮度異服危冠交遊冗雜尤善屠牛業以為常於宅內沽酒好騎射位中書侍郎每求試邊州帝以其輕脫無威望抑而不試遷給事黃門侍郎上表請自解帝手詔責之坐免官因此杜門絕朝覲普通五年坐於宅鑄錢為有司所奏下廷尉得免死徙臨海郡行至上虞有勅追還令受菩薩戒既至恂恂盡禮改意蹈道持戒尤精潔帝甚嘉之以為晉陽太守

南平王恪位雍州刺史年少未閑庶務委之羣下百姓
每通一辭數處輸錢方得聞徹賓客有江仲舉蔡遠王
臺卿庾仲容四人俱被接遇並有蓄積故人間歌曰江
千萬蔡五百正王新車庾大宅遂達武帝接之曰主人
憤憤不如客尋以廬陵王代為刺史恪還奉見武帝以
人間歌語之恪大慙不敢一言後折節學問所歷以善政
稱

後魏秦明王翰孫纂太武踐阼為定州刺史封中山王

纂好酒愛佞政以賄成太武殺其親嬖人後悔過修謹
拜內大將軍居官清約簡慎更稱廉平

濟陰王鬱孫暉業少險薄多與寇盜交通長乃變節涉
子史亦頗屬文而慷慨有志節歷位司空太尉

北齊永安簡平王浚及長嬉戲不節曾以屬請受納大
見杖罰拘禁府獄既而見原後稍折節頗以讀書為務
安德王延宗為定州刺史驕縱多不法武成使捷之殺
其昵近九人從是深自改悔

唐彭王元則高祖第十二子初為遂州都督坐事免及
遷澧州折節自修甚著聲績

後唐太祖母弟克柔養子嗣昭沈毅不羣初喜嗜酒太
祖微申戒約自是終身不飲

冊府元龜卷二百七十四

欽定四庫全書

冊府元龜卷二百七十五 宋 王欽若等 撰

宗室部

褒寵

古之有天下者莫不封建宗子夾輔王室親之以脈膺之禮厚之以寶玉之賜既以旌賢而彰德亦以修睦而申恩成周以來或加之殊禮推以蕃錫異其車服之數厚以宴私之意寵遇官屬增給騎從徙國益賦懋賞延

世圖像以昭其美下詔以揚其善乃至耆年尊屬優以
几杖之賜送終即遠殊其窳窳之制極禮命之優渥聳
藩維之風望皆所以彊幹固本興仁宣化法敦族於唐
典遵立愛於商訓者也

周公旦武王弟歸政成王欲老成王留之為太師履赤

舄

赤舄人君之盛履也

周公既卒成王乃命魯得郊祭文王魯有

天子禮樂者以褒周公之德也又分魯公以大輅大旂

魯公伯禽大輅金輅錫同姓之諸侯車也交龍為旂周禮同姓以封

夏后氏之璜封父之

繁弱

封父古諸侯也
繁弱大弓名

以昭周公之明德

衛康叔封武王弟也成王賜衛寶祭器以彰有德分康

叔以大路少帛績茂旃旌

少帛雜帛也績茂大赤取染
草名也通帛為旂析羽為旌

大呂

鐘名

唐叔虞武王子成王分唐叔以大路密須之鼓

密須國名闕

鞶

甲名
沽洗名鐘

魯公康叔唐叔三叔者有令德故昭之以

分物

漢楚元王交高祖同父少弟六年立為楚王文帝尊寵

元王子生爵比皇子

元王生子封爵皆比皇子所以為尊寵也

濟北王勃淮南厲王長子初封衡山王七國反吳使者至衡山衡山王不應堅守無二心孝景四年吳楚已破衡山王朝帝以為貞信乃勞苦之曰南方卑濕徙王王於濟北以褒之

梁孝王武文帝子竇太后少子太后愛之賞賜不可勝道得賜天子旌旗從千乘萬騎

江都易王非景帝子吳楚反時非年十五上書自請擊

吳景帝賜非將軍印擊吳吳已破以軍功賜天子旌旗
淮南王安菑川王志元朔二年冬皆賜几杖毋朝

廣陵王胥武帝子昭帝初立益封胥萬三千戶元鳳中
入朝復一萬戶賜錢二十萬黃金二千斤安車駟馬寶
劔及宣帝即位封胥四子聖曾寶昌皆為列侯又立胥
小子弘為高密王所以褒賞甚厚

陽城侯德楚元王曾孫少時數言事召見甘泉宮武帝
謂之千里駒地節中以親親行謹厚封為陽城侯子安

民為郎中右曹宗家以德得官宿衛者二十餘人甘露
三年單于始入朝帝思股肱之美乃圖畫其人麒麟閣
法其形貌署其官爵姓名凡十一人其八曰宗正陽城
侯劉德皆有功德知名當世是以表而揚之明著中興
輔佐列於方叔名虎仲山甫焉

淮陽王欽宣帝子成帝即位以淮陽王屬為叔父敬寵
之異於它國

楚孝王囂宣帝子成帝河平中入朝時被疾天子聞之

下詔曰蓋聞天地之性人為貴人之行莫大于孝楚王
蠶素行孝順仁慈之國以來二十餘年纖介之過未嘗
聞朕甚嘉之今乃遭命離於惡疾夫子所痛曰蔑之命矣
夫斯人也而有斯疾也朕甚閔焉夫行純茂而不顯異
則有國者將何勗哉書不云乎用德章厥善今王朝正
月詔與子男一人俱從王入朝也其以廣戚縣戶四千三百
封其子勲為廣戚侯

河間王良獻王後也脩獻王之行太后薨服喪如禮哀

帝下詔褒揚曰河間王良喪太后三年為宗室儀表其益封萬戶

後漢城陽王祉光武族兄建武二年封賜乘輿御物車馬衣服十一年疾病上城陽王璽綬願以列侯奉先人祭祀帝自臨其疾

安成侯賜光武族兄以列侯奉朝請帝以賜有恩信故親厚之數蒙宴私時幸其第恩賞特異賜輒賑與故舊無有遺積帝為營冢起祠廟置吏卒如春陵孝侯

成武侯順與光武同里閑少相厚成武邑戶最大租入
倍宗室諸家建武十一年卒帝使使者迎喪親自臨弔
杼秋侯劉般宣帝玄孫建武十九年行幸沛詔問郡中
諸侯行能太守薦言般束脩至行為諸侯師帝聞而嘉
之乃賜般緡錢百萬繒二百匹二十年復與車駕會沛
因從還雒陽賜穀什物留為侍祠侯永平元年徙封居
巢侯就國數年揚州刺史觀恂薦般在國口無擇言行
無怨惡宜蒙旌顯明帝嘉之十年徵般行執金吾事從

至南陽還為朝侯明年兼屯騎校尉時五校官顯職閒而府寺寬敞輿服光麗伎巧畢給故多以宗室肺腑居之每行幸郡國般常將長水胡騎從帝即位以為長樂少府建初二年遷宗正般妻卒厚加賙贈及賜冢塋地於顯節陵下

東海恭王彊光武長子建武十九年封為東海王二十八年就國帝以彊廢不以過去就有禮故優以大封兼食魯郡合二十九縣賜虎賁旋頭宮殿設鐘簾之懸擬於

乘輿彊臨之國數上書讓還東海又因皇太子固辭帝
不許深嘉嘆之以彊章宣示公卿初魯恭王好宮室起
靈光殿甚壯麗是時猶存故詔彊都魯永平元年彊病
顯宗遣中常侍鈞盾令將太醫乘驛視疾詔沛王輔濟
南王康淮陽王延詣魯及薨臨命上疏謝曰臣蒙恩得
備藩輔特受二國宮室禮樂事事殊異巍巍無量訖無
報稱而自修不謹連年被疾為朝廷憂念皇太后陛下
哀憐臣彊感動發中數遣使者太醫令丞方伎道術絡

驛不絕臣伏惟厚恩不知所言臣內省視氣力羸弱日
夜浸困終不復望見闕庭奉承帷幄孤負重恩銜恨黃
泉身既天命孤弱復為皇太后陛下憂慮誠悲誠慙息
政小人也猥當襲臣後必非所以全利之也誠願還東
海郡天恩愍哀以臣無男之故處臣三女小國俟此宿
昔常計今天下新罹大憂惟陛下加供養皇太后數進
御食臣彊困劣言不能盡意願並謝諸王不意永不復相
見也天子覽書悲慟從太后出幸津門亭發哀使大司

空持節護喪事大鴻臚副宗正將作大匠視喪事贈以
殊禮升龍旌頭鸞輅龍旂虎賁百人詔楚王英趙王栩
北海王興館陶公主比陽公主及京師親戚四姓夫人
小侯皆會葬帝追惟彊深執謙儉不欲厚葬以違其意
於是特詔中常侍杜岑及東海傅相曰王恭謙好禮以德
自終遣送之物務從約省衣足歛形茅車瓦器物減於
制以彰王卓爾獨行之志將作大匠留起陵廟

東平王蒼光武子好經書雅有智思明帝甚愛重之及

即位拜為驃騎將軍置長史掾史員四十人位在三公

上

四府掾史皆無四十人今特置以優之

蒼上疏乞上驃騎將軍印綬退

就藩國優詔不聽其後數陳乞辭甚懇切永平五年乃

許還國而不聽上將軍印綬以驃騎長史為東平太傅

掾為中大夫令史為王家郎加賜錢五十萬布十萬疋

六年冬帝幸魯徵蒼從還京師明年蒼乃歸國特賜宮

人奴婢五百人布二十五萬疋及珍寶服御器物蒼為

人美須髯腰帶八圍明帝手詔國中傅曰日者問東平

王處家何等最樂王言為善最樂其言甚大副是要腹矣
今送列侯印十九枚諸王子年五歲已上能趨拜者皆
令帶之十五年春行幸東平賜蒼錢千五百萬布四萬
疋章帝即位尊重恩禮踰於前世諸王莫與為比建初
元年地震蒼上便宜三事帝曰朕親自覽讀反覆數周心開
目明曠然發矇韋昭注國語目有矇
眸子而無見曰矇問吏人奏事亦有此
言但明智淺短或謂儻是復慮為非何者災異之降緣
政而見今改元之後年饑人流此朕之不德感應所致

又冬春旱甚所被尤廣雖內用克責而不知所定得王
深策快然意解詩不云乎未見君子憂心冲冲既見君
子我心則降思惟嘉謨以次奉行冀蒙福應彰報至德
特賜王錢五百萬六年冬蒼上疏求朝明年正月帝許
之特賜裝錢千五百萬其餘諸王各千萬帝以蒼冒涉
寒露遣謁者賜貂裘說文曰貂鼠屬也大而黃黑出丁零國及大官食物
珍果使大鴻臚竇固持節郊迎帝乃親自循行邸第豫
設帷帳其錢帛器物無不充備下詔曰禮伯父歸寧乃

國

儀禮曰覲禮諸侯至於郊王使皮弁用璧勞侯氏侯氏亦皮弁迎於惟門之外再拜天子賜舍曰賜伯父

舍同姓西面北上異姓東面北上侯氏禪冕釋幣於禩乘墨車載龍旂弧韜乃朝以瑞玉有纁天子負斧辰曰伯父實來余一人嘉之又奉束帛四馬再拜侯氏降天子辭於侯氏曰伯父無事歸寧乃邦侯氏再拜稽首而

歸也詩云叔父建爾元子

詩魯頌之文也叔父謂周公也建元子謂封伯禽也敬之

至也昔蕭相國加以不名優忠賢也

見前漢王莽傳

况兼親尊

者乎其沛濟南東平中山四王讚皆勿名

讚謂讚者不唱其名

蒼

既至升殿乃拜天子親荅之舊典諸王女皆封鄉主乃

獨封蒼五女為縣公主三月大鴻臚奏遣諸王歸國帝

特留蒼賜秘書列仙圖道術秘方至八月飲耐畢有司復奏遣蒼乃許之手詔賜蒼曰骨肉天性誠不以遠近為親疎然數見顏色情重昔時念王久勞思得還休欲署大鴻臚奏不忍下筆顧授小黃門中心戀戀惻然不能言

大臚奏王歸國小黃門受詔者

於是車駕祖送流涕而訣復賜乘

輿服御珍寶輿馬錢布以億萬計蒼還國疾病馳遣名醫小黃門侍疾使者冠蓋不絕於道又置驛馬千里傳問起居明年正月薨詔遣大鴻臚持節五官中郎將副

監喪及將作使者凡六人令四姓小侯諸王主悉會詣
東平奔喪賜錢前後一億布九萬疋及葬策曰惟建初
八年三月己卯皇帝曰咨王丕顯勤勞王室親受策命
昭於前世出作藩輔克慎明德率禮不越傳聞在下昊
天不弔不報上仁俾屏余一人夙夜兢兢靡有所終今詔
有司加賜靈輅乘馬龍旂九旒虎賁百人奉送王行匪我憲
王其孰離之魂而有靈保茲寵榮嗚呼哀哉元和三年
行東巡狩幸東平宮帝追感念蒼謂其諸子曰思其人

至其鄉其處在其人亡因泣下沾襟遂幸蒼陵為陳虎
賁鑿輅龍旂以章顯之祠以太牢親拜祠坐哭泣盡哀
賜御劍于陵前

中山王馬光武子以郭太后少子故獨留京師顯宗永
平二年冬諸王來會辟雍事畢歸藩詔馬與俱就國從
以虎賁官騎馬疏辭讓明帝報曰凡諸侯出境必備左

右故夾谷之會司馬以從今五國各官騎百人稱媼媼稱

謂齊整也

前行皆北軍胡騎便兵善射弓不空發中必決背

夫有文事必有武備所以重藩職也王其勿辭帝以馬
郭太后偏愛特加恩寵獨得往來京師永元二年馬薨
自中興至和帝時皇太子始封薨者皆賻錢三千萬布
三萬疋嗣王薨賻錢千萬布萬疋是時竇太后臨朝竇
憲兄弟擅權太后及憲等東海王出也故睦於馬而重
於禮加賻錢一億詔濟南東海二王皆會大為修冢塋
開神道平夷吏人家墓以千數作者萬餘人發恒山鉅
鹿涿郡柏黃楊雜木三郡不能備復調餘州郡工徒及

送致者數千凡徵發搖動六州十八郡制度餘國莫及
瑯邪孝王京光武之子性恭孝好經學顯宗尤愛幸賞
賜恩寵殊異莫與為比

楚王英光武子少時好遊俠通賓客晚節更喜黃老學
為浮屠齋戒祭祀明帝永平八年詔令天下死罪皆入
縑贖英遣郎中令奉黃縑白紵三千疋詣國相曰託在
藩輔過惡累積歡喜大恩奉送縑帛以贖愆罪國相以
聞詔報曰楚王誦黃老之微言尚浮屠之仁惻潔齋三

月與神為誓何嫌何疑當有悔吝其還贖以助伊蒲塞

桑門之盛饌

伊蒲塞即優婆塞也中華翻為近住言受戒行堪近僧住也桑門即沙門

因以

班示諸國中傅

下博侯張齊武王續孫以善議論永平十六年與奉車

都尉竇固等並出擊匈奴後進者多害其能數被譖訴

建初中卒章帝下詔褒揚之復封張子它人奉其祀

下邳王衍明帝子永平十五年封衍有容貌章帝即位

常在左右建初初冠詔賜衍師傅已下官屬金帛各有

差

清河王慶章帝子建初四年立為皇太子十年廢為清
河王母宋貴人自殺慶時雖幼而知避嫌畏禍言不敢
及宋氏帝憐之勅皇后令衣服與太子齊等太子特親愛入
則共室出則同與及太子即位是為和帝待慶尤渥諸
王莫得為比常共議私事永元四年移幸于北宮章德
殿講於白虎觀慶得入省止宿中傅衛訢私為賊盜千
餘萬詔使案理之并責慶不舉之狀慶曰訢以師傳之

尊選自聖朝臣愚唯知言從事聽不甚有所糾察帝嘉其對悉以訖贓財賜慶殤帝即位諸王就國鄧太后特聽清河王置中尉內史賜什物皆取乘輿上御以外家宋衍等並為清河中大夫鄧太后以殤帝襁抱留慶長子祐居清河邸後立是為安帝慶薨遣司空持節與宗正奉弔祭使車騎將軍鄧騭護喪事又使長樂謁者僕射中謁者二人副護喪事賜龍旂九旒虎賁百人儀比東海恭王太后使掖庭丞送安帝生母左姬喪與王合

葬廣丘

濟北惠王壽章帝子立三十一年薨永初以後戎狄叛
亂國用不足始封王薨減賻錢為千萬布萬疋嗣王薨
五百萬布五千疋時惟壽最尊親特賻錢三千萬布三
萬疋

東海王臻恭王彊曾孫性敦厚有恩常分租秩賑給諸
父昆弟國相籍褒具以狀聞順帝美之制詔大將軍三
公大鴻臚曰東海王臻以近藩之尊少襲王爵膺受多

福未知艱難而能克已率禮孝敬自然事親盡愛送終
竭哀降儀從士寢苦三年和睦兄弟恤養孤弱至孝純
備仁義兼弘朕甚嘉焉夫勸善厲俗為國所先曩者東
平孝王敞兄弟行孝喪母如禮有增戶之封詩云永世
克孝念茲皇祖今增臻封五千戶臻弟儉五百戶光啓
土宇以酬厥德

彭城王和性至孝太夫人薨行喪陵次毀瘠過禮傅相
以聞桓帝詔使奉牛酒迎王還宮

魏任城王彰武帝子黃初初就國詔曰先王之道庸勲親親並建母弟開國承家故能藩屏大宗禦侮厭難彰前受命北伐清定朔土厥功茂焉增邑五千并前萬戶四年朝京都疾薨于邸謚曰威至葬賜鑾輅龍旂虎賁百人如漢東平王故事

陳思王植武帝之子初封雍丘王黃初六年文帝東征還過雍丘幸植宮增戶五百

彭城王據武帝子初封義陽文帝以南方下濕又以據

太妃彭城人徙封彭城

中山恭王衮武帝子黃初三年封北海王其年黃龍見
鄴西漳水衮上章贊頌詔賜黃金十斤詔曰昔唐叔歸
禾東平獻頌斯皆骨肉贊美以彰懿親王研精墳典耽
味道真文雅煥炳朕甚嘉之王其克慎明德以終令聞
衮有令德青龍三年秋得疾病詔遣太醫視病殿中虎
賁齋手詔賜珍膳相屬又遣太妃沛王林並就省疾及
薨詔沛王林留訖葬使大鴻臚持節典護喪事宗正弔

祭賻贈甚厚

安陽鄉侯休太祖族子少值喪亂渡江至吳太祖舉義
兵北歸見太祖太祖謂左右曰此吾家千里駒也使與
文帝同止見待如子嘗從征伐使領虎豹騎宿衛及為
鎮南將軍假節都督諸軍事車駕臨送帝乃下與執手
而別

陳侯仁太祖從弟也為征南將軍以從事鄢陵侯彰北
征烏丸文帝在東宮為書戒彰曰為將奉法不當如征

南邪及即王位拜仁車騎將軍督都荆揚益州諸軍事
增邑二千并前三千五百戶追賜仁父熾謚曰陳穆侯置
守冢十家

邵陵侯真太祖族子也明帝時為大將軍蜀諸葛亮圍
祁山真督諸軍事亮圍陳倉已有備而不能克增邑并
前二千九百戶四年朝雒陽遷大司馬賜劍履上殿入
朝不趨真病帝自幸其第省疾真薨帝追真功詔曰大
司馬蹈履忠節佐命二祖內不恃親戚之寵外不驕白

屋之士可謂能持盈守位勞謙其德者也其封真五子
為列侯

武安侯爽邵陵侯真子少以宗室謹重明帝在東宮甚
親愛之及即位累遷城門校尉加散騎常侍轉武衛將
軍寵待有殊齊王即位賜劍履上殿入朝不趨贊拜不名
晉安平王孚宣帝次弟武帝受禪拜太宰持節都督中
外諸軍有司奏諸王未之國者所置官屬權未有備帝
以孚明德屬尊遂備置官屬焉又以孚內有親戚外有

交遊惠下之費而用不豐奉絹二千疋元會詔安平王孚乘輿車上殿帝於阼階迎拜既坐帝親奉觴上壽如家人禮帝每拜孚跪而止之又給以雲母輦青蓋車孚雖見尊寵不以為榮常有憂色孚薨武帝於太極東堂舉哀三日詔曰王勲德超世尊寵無二期頤在位朕之所倚庶永百齡諮仰訓導奄忽殂隕哀慕感切其以東園溫明秘器朝服一具衣一襲緋練百匹絹布各五百疋錢百萬穀千斛以供喪事諸所施行皆依漢東平獻

王蒼故事帝再臨喪親拜盡哀及葬又幸都亭望柩而拜哀動左右給鑿輅輕車介士虎賁百人吉凶導從二千餘人前後鼓吹配饗太廟

平原王幹宣帝子武帝踐祚給鼓吹駙馬二匹加侍中之服太康末加侍中特假金章紫綬班次三司惠帝即位劔履上殿入朝不趨

瑯邪武王佗宣帝子太康四年薨疾篤賜牀帳衣服錢帛杭梁等物遣侍中問焉

扶風武王駿宣帝子咸寧中以氐戶在國界者增封給羽葆鼓吹病薨追贈大司馬加侍中假黃鉞

汝南王亮宣帝子武帝踐祚封扶風王三年徙封汝南王鎮南大將軍都督豫州諸軍事開府假節之國給追鋒車阜輪犢車錢五十萬徵為侍中武帝寢疾出為大司馬假黃鉞大都督督豫州諸軍事出鎮許昌加軒懸之樂六佾之舞楊駿誅亮為太宰錄尚書事入朝不趨劍履上殿增掾屬十人給千兵百騎為楚王瑋矯詔所殺

瑋死追復爵位給東園溫明秘噐朝服一襲錢三百萬
布萬疋絹三百疋喪禮如安平王故事廟設軒懸之樂
義陽王望安平王子泰始三年詔進位太尉中領軍如
故上太尉軍司一人參軍事六人騎司馬五人又增置
官騎十人并前三十假羽葆鼓吹

高陽元王珪安平王子泰和十年薨詔遣兼大鴻臚持
節監護喪事贈車騎將軍儀同三司珪有美譽於世而
帝甚悼惜之

彭城穆王權宣帝弟東武城侯馘子武帝受禪為北中
郎將內都督鄴城守諸軍事泰始中入朝賜袞冕之服

太原王瓌安平王孫泰始二年就國四年入朝賜袞冕
之服遷東中郎將十年薨詔曰瓌乃心忠篤智器雅亮
歷位文武有幹事之績出臨封土夷夏懷附鎮守許都
思謀可紀不幸早薨朕甚悼之今安厝在近其追贈前
將軍

齊獻王攸文帝子景帝無後命攸為嗣武帝踐祚封齊

王太康三年詔曰齊王攸明德清暢忠允篤誠以母弟之親受台輔之任佐命立勲劬勞王室宜登顯位以稱具瞻其以為大司馬都督青州諸軍事侍中如故假節將本營千人親騎帳下司馬大軍皆如舊增鼓吹一部官騎滿二十人置騎司馬五人明年詔攸曰惟我有晉受天明命光建羣后越造王國于東土錫茲青社用藩翼我邦家茂哉無怠以永保宗廟又詔下太常議崇錫之物以濟南郡益齊國又以攸子寔為北海王於是備物典

策設軒懸之樂六佾之舞黃鉞朝車乘輿之副從焉攸
薨詔喪禮依安平王孚故事廟設軒懸之樂配饗太廟
河間王顥太原王瓌子初襲父爵咸寧三年改封河間
少有清名輕財愛士與諸王俱來朝武帝嘆顥可以為
諸國儀表

西陽郡王羨汝南王亮子永嘉南渡元帝承制拜撫軍
大將軍及元帝踐祚進位侍中太保以羨屬尊元會特
為設牀太興初錄尚書事尋領大宗師加羽葆斧鉞班

劍六十人進位太宰及王敦平領太尉明帝即位以叢
宗室元老特為之拜明帝寢疾叢與王導同受顧命輔
成帝時帝幼冲詔叢依安平獻王孚故事設牀帳於殿
上帝親拜迎

汝南王祐汝南王亮孫永安中從惠帝北征帝遷長安
祐反國及帝還雒以征南兵八百人給之特置四部牙
門

秦王東武帝子於諸子中尤見寵愛以左將軍居齊獻

王故府甚貴寵為天下所屬自元康元年薨朝野痛惜之
葬禮如齊獻文王攸故事廟設軒懸之樂

武陵王晞元帝子穆帝即位累遷太宰太和初加羽葆
鼓吹入朝不趨贊拜不名劍履上殿固讓

瑯邪王煥元帝子鄭夫人所生母有寵元帝特所鍾愛
疾篤帝為之徹膳及薨年二歲帝悼念無已將葬以煥
既封列國加以成人之禮詔立凶門栢歷備吉凶儀服
營起陵園功役甚衆

會稽王昱元帝子太和元年進位丞相錄尚書事入朝
不趨讚拜不名劍履上殿給羽葆鼓吹班劍六十人昱
固讓

會稽王道子簡文子大元初進驃騎將軍錄尚書六條事
領司徒謝安薨詔領揚州刺史錄尚書假節都督中外
諸軍事衛府文武一以配驃騎府固讓不受公卿又奏
進位丞相揚州牧假黃鉞羽葆鼓吹並不受安帝即位
有司奏進位太傅假黃鉞備殊禮又不受後並世子元

顯俱為桓玄所害及玄敗大將軍武陵王遵承旨下令
曰故太傅公阿衡二世契闊皇家親賢之重地無與二
驃騎大將軍內總朝維外宣威畧志蕩世難以寧國祚
天未靖亂禍酷備鍾悲動區宇痛貫人鬼感惟永往心
情摧隕今皇祚反正幽顯式叙宜崇明國體以述舊典
便可追崇太傅為丞相加殊禮一依安平獻王故事追
贈驃騎為太尉加羽葆鼓吹丞相墳塋翳然飄薄非所
須南道清通便奉迎神樞太尉宜便遷改可下太史詳

吉日定宅兆於是遣通直常侍司馬珣之迎道子柩於安成時寇賊未平喪不時達義熙元年合葬於王妃陵追謚會稽文孝王道子世子元顯曰忠

武陵忠敬王遵威王子桓玄篡位安帝蒙塵於尋陽義旗興密詔遵總攝萬機及安帝反正更拜太保加班劍二十人義熙四年薨詔賜東園溫明秘器朝服一具衣一襲錢百萬布千疋策贈太傅葬加殊禮

琅邪王德文安帝母弟元興初桓玄執政進位太宰加

袞冕之服綠綬綬桓玄平拜大司馬領司徒加殊禮義
熙二年置左右長史司馬從事中郎四人加羽葆鼓吹十二
年詔曰大司馬明德懋親太尉道勲光大並徽序彝倫變
和二氣髦俊引領思佐鼎飪而雅尚冲挹四門弗闕誠
合大雅謙虛之道實違急賢贊世之務昔蒲輪載徵異
人並出東平開府竒士嚮臻濟濟之盛朕有欽焉可勅
二府依舊辟召必將明敷俊乂嗣軌前賢矣於是始辟
名掾屬時太尉裕都督中外諸軍詔曰大司馬地隆任

重親賢莫二雖府受節度可身無致敬

冊府元龜卷二百七十五

欽定四庫全書

冊府元龜卷二百七十六 宋 王欽若等 撰

宗室部

褒寵二

宋長沙景王道憐高祖中弟永初二年朝正入住殿省
三年高祖不豫加班劍三十人六月薨追贈太傅持節
侍中都督刺史如故祭禮依晉太宰安平王故事鸞輅
九旒黃屋左纛輜輶挽歌二部前後部羽葆鼓吹虎賁

班劍百人

長沙成王義欣景王道憐子元嘉七年遷使持節監豫
司雍并四州諸軍事征虜將軍如故給鼓吹一部十一
年夏入太廟太祖厚加恩禮

臨川烈武王道規高祖少弟晉義熙末位至荊州刺史
征西將軍高祖受命贈大司馬追封臨川王文帝少為
道規所養後文帝還本以長沙王子義慶嗣慶為荊州
廟主當隨往江陵文帝下詔褒美勲德及慈蔭之重曰

褒道崇德經國之盛典尊親追遠因心之所隆故侍中
大司馬臨川烈武王體道欽明至德淵邈睿哲自天孝
友光備爰始協規則翼贊景業陵威致討則尅翦梟鯨
逮妖逆交侵方難孔棘勢踰累棊人無固志王神謨
獨運靈武宏發輯寧內外誅覆羣凶固已化被江漢勲
高微管遠猷侔於二南英雄邁於兩獻矣朕幼蒙殊愛
德廕特隆豐恩慈訓義深情戚永惟仁範感慕纏懷今
當擁移寢祐初祀西夏思崇嘉禮式備徽章庶以昭宣

風度允副幽顯其追崇丞相加殊禮鸞輅九旒黃屋左
纛給節鉞前後部羽葆鼓吹虎賁班劍百人侍中如故
及長沙太妃檀氏臨川太妃曹氏後薨祭皆給鸞輅九
旒黃屋左纛輜輶車挽歌二部前後部羽葆鼓吹虎賁
班劍百人

江夏文獻王義恭高祖之子高祖特所鍾愛諸子莫及
元嘉十七年徵為侍中司徒錄尚書事給班劍二十人
置兵加仗二十一年進位太尉領司徒相府年給錢二

千萬他物稱此而義恭性奢用常不足太祖又別給錢年
千萬二十六年領國子祭酒時有獻五百里馬者以賜義
恭二十七年出鎮彭城二十九年冬還朝帝以御乘蒼鸞
船上迎之元凶弒逆義恭上表勸進世祖踐阼特授使持
節侍中都督揚南徐三州諸軍事太尉錄尚書六條事揚
南徐二州刺史給鼓吹一部班劍二十人又假黃鉞事寧
進位太傅領大司馬增班劍為三十人以藩所服玉環大
綬賜之增封二千戶孝建元年南郡王義宣臧質魯爽等

反加黃鉞白直百人入六門事平以臧質七百里馬賜義
恭又增封二千戶大明三年省兵佐加領中書監以崇藝
昭武永化三營合四百三十七戶給府更增吏僮千七百人
合為二千九百人六年解司徒府太宰司依舊辟召又
年給三千匹布撰國史孝武自為義恭作傳永光元年八
月為廢帝所害明帝定亂追崇使持節侍中都督中外諸
軍事丞相領太尉中書監錄尚書事並如故給九旒鸞輅虎
首班劍百人前後部羽葆鼓吹輜輶車又下詔曰皇基崇

建屯剝維難弘啟熙載底績忠果故從享世祀勒勲宗
彝世祖寧亂定業實資翼亮故使持節侍中都督中外
諸軍事丞相領太尉中書監錄尚書事江夏文獻王義
恭故使持節侍中都督南豫江豫三州軍事太尉南豫州刺
史巴東郡開國忠烈公元景故侍中司空始興郡開國襄
公慶之故持節征西將軍雍州刺史洮陽縣開國肅侯
愨或體道冲玄變化康世或盡誠致効夷難龕逆宜式
遵國典陪祭廟廷

義恭子伯禽孝建三年生元兗作逆義恭諸子皆遇害
朝廷哀之至是孝武名之曰伯禽以擬魯公伯禽周公
旦之子也

衡陽王義季高祖之子太祖為荊州高祖使隨往繇是
特為太祖所愛元嘉十六年代臨川王義慶為荊州給
鼓吹一部義季素拙書帝聽使餘人書啟事唯自署名
而已義季病篤帝遣中書令徐湛之省疾召還京師未
及發薨於彭城時年三十三

彭城王義康高祖之子太祖即位進號驃騎將軍加散
騎常侍給鼓吹一部元嘉二年改授都督荆湘等八州
諸軍事給班劍三十人九年太妃薨辭班劍解侍中十
二年復加侍中班劍

南郡王義宣高祖之子世祖即位以為中書監進號中
軍將軍加散騎常侍給鼓吹一部又都督揚豫二州丞
相錄尚書六條加羽葆鼓吹給班劍四十人

竟陵王誕文帝第六子元嘉二十六年為會稽太守加

鼓吹一部孝武既平元克進號驃騎將軍加班劍二十人

建平王宏文帝第七子也文帝寵愛殊常為立第於雞籠山盡山水之美建平國職高他國一階

廬江王禧文帝第八子大明二年為散騎常侍中書令領驍騎將軍給鼓吹一部明帝踐阼加侍中中書監給班劍三十人

桂陽王休範文帝第十八子永光初以驃騎大將軍還

為江州進督越州諸軍事給三望車一乘明帝遺詔進位司空侍中加班劍三十人

始平王子鸞孝武第八子母殷淑儀寵傾後宮子鸞愛冠諸子凡為帝眄過者莫不入子鸞之府國及為南徐州又割吳郡以屬之六年以本官兼司徒進號撫軍司徒給節禮儀並依正公又加都督南徐諸軍事八年加中書令領司徒

成安王準明帝第三子拜撫軍將軍置佐史元徽二年

進號車騎將軍都督揚南豫州諸軍事給鼓吹一部刺
史如故四年又進驃騎大將軍號開府儀同三司班劍
三十人都督刺史如故

營浦侯遵考高祖族弟也明帝即位為侍中特進右光
祿大夫領崇憲太僕給親侍三十人泰始五年賜几杖
大官四時賜珍味疾病太醫給藥固辭几杖

當陽侯秉長沙王道憐孫也為尚書左僕射參選元徽
元年領吏部加兵五百人桂陽王休範為逆中領軍勅

出守石頭秉權兼領將軍所給加兵自隨入殿

南譙王世子恢南郡王義宣子也晉氏過江不置城門
校尉及衛尉官孝武欲重城禁故復置衛尉卿以恢為
侍中領衛尉衛尉之置自恢始也

南齊豫章王嶷太祖第二子特所鍾愛太祖即位以為
都督荆湘等八州諸軍事南蠻校尉荆湘二州刺史持
節侍中將軍開府如故晉宋之際刺史多不領南蠻別
以重人居之至是二府二州荆州資費歲錢三千萬布

萬疋米六萬斛南蠻資費歲錢三百萬布萬疋絲千斤
絹三百疋米千斛近代莫比也尋給油絡俠望車又給
班劍二十人入為都督揚南徐二州諸軍事中書監司
空加兵置佐以前軍臨川王映府文武配司空府世祖
即位進位太尉永明二年中詔曰漢之梁孝寵異列藩
晉之文獻秩殊常序况乃地侔前准勲兼徃式雖天倫
有本而因事增情宜廣田邑用申恩禮增封為四千戶
元嘉世諸王入齋閣得白服帟帽見人主唯出太極四

廟乃備朝服自比已來此事一斷帝與疑同生持相友
睦宮中曲宴許依元嘉疑固辭不奉勅唯車駕幸第乃
白服烏紗帽侍宴大明八年給皂輪車妃庾氏嘗有疾
瘳帝幸後堂設金石樂宮人畢至每臨幸輒極日盡歡
疑疾篤表解職不許賜錢百萬營功德疑又啟曰臣自
嬰今患亟降天臨醫走術官泉開藏府慈寵優渥備極
人臣生年疾迫遽陰無幾願陛下審賢與善極壽蒼旻
強德納和為億兆御臣命違昌數奄奪恩憐長辭明世

伏涕嗚咽薨日帝再視疾至薨乃還宮詔曰疑明哲至親勲高業始德懋王朝道光區縣奄至薨逝痛酷抽割不能自勝奈何奈何今便臨哭九命之禮宜備其制斂以衮冕之服溫明秘器命服一具衣一襲喪事一依漢東平王故事大鴻臚持節護喪事太官朝夕送奠大司馬太傅二府文書悉停過葬竟陵王子良上啓曰臣聞春秋所以稱王母弟者以尊其所重故也是以禮秩殊品爵命崇異在漢則梁王備出警入蹕之儀在晉則齊

王具殊服九命之贈江左以來尊親是闕故致袞冕之
典廢而不傳實繇人缺其位非禮虧省齊王故事與今
不殊締構王業功迹不異凡有變革隨時之宜者正緣
恩情有輕重德義有厚薄若事籌前規禮無異則且梁
齊闕令終之美猶饗褒贈之榮况故大司馬仁和著於
天性孝弟終於立身節義表於勤王寬猛彰於御物奉
上無艱劬之貌接下無毀傷之容淡矣止於清貞無喜
愠之色悠然棲於靜默絕馳競之聲詩有云靡不有初

鮮克有終夫終之者理實為難在於令行無廢斯德東
平樂於小善河間悅於詩書勲績無聞艱危不涉尚
致卓爾不羣英聲萬代況今協贊皇基經綸霸始功業
高顯清譽踰彰富貴隆重庶潔彌峻等古形今孰類茲
美臣愚忖度未有斯例凡庶族同氣愛睦尚少豈有仰
覩陛下垂友于之性若於此者乎共起布衣俱登天貴
生平游處何事不同分甘均味何珍不等未嘗覩貌而
天心不懽見形而聖儀不悅爰及臨危捨命親瞻喘息萬

分之際沒在聖目號哭動乎天地感慟驚乎鬼神乃至
撤膳移寢坐泣遷旦神儀損耗隔宿改容奉瞻聖顏誰
不悲悚歷古所未聞記籍所不載既有若斯之大德實
不可見典服之贈不彰如其脫致虧忘追改為煩不令
千載之下物有遺恨其德不具美者尚荷嘉隆之命况
事光先烈者寧可缺茲盛典臣恐有識之人容致其議
且庶族近代桓溫庾亮之類亦降殊命伏度天心已當
有在又詔曰寵章所以表德禮秩所以紀功慎終追遠

前王之盛策累行疇庸列代之通誥故使持節都督揚南徐二州諸軍事大司馬領太子太傅揚州刺史新除中書監豫章王疑體道秉哲經仁緯義挺清譽於弱齡發韶風於早日締綸霸業之初翼贊皇基之始孝睦著於鄉閭忠諒彰乎邦邑及秉德論道總收神甸七教必荷六府咸理振風潤雨無愆於時候郵民拯物有篤於矜懷雍容廊廟之華儀刑列郡之觀神凝自遠具瞻允集朕友于之深情兼家國方授以神圖委諸廟勝緝頌

九紘陪禪五嶽天不憖遺奄馬薨逝哀痛傷惜震動乎
厥心今先遠戒期龜謀襲吉宜加茂典以協徽猷可贈
假黃鉞都督中外諸軍事丞相揚州牧綠綬綬具九服
錫命之禮侍中大司馬太傅王如故給九旒鸞輅黃屋
左纛虎賁班劍百人輜輶車前後部羽葆鼓吹葬送儀
依東平王故事

臨川獻王映太祖第三子出為都督荆湘等九州諸軍
事鎮西將軍給鼓吹一部永明二年給油絡車七年薨

詔賜東園秘噐朝服一具衣一襲贈司空

長沙威王晃太祖第四子世祖即位進號車騎將軍侍
中如故給油絡車鼓吹一部永明八年薨賜東園秘噐
朝服一具衣一襲即本號贈開府儀同三司太祖嘗曰
此我家任城也世祖緣此意謚曰威

武陵昭王暉太祖第五子母羅氏從太祖在淮陰以罪
誅暉思慕故見愛世祖即位為丹陽尹常侍將軍如故始不
復置行事得自親政轉侍中護軍將軍給油絡車又給

扶二人世祖遺詔為衛將軍開府儀同三司給鼓吹一部隆昌元年薨賜東園秘器朝服贈司空侍中如故給節班劍二十人

鄱陽王鏘太祖第七子鏘和悌美令有寵於世祖永明十一年為領軍將軍領軍之授齊室諸王所未為車駕遊幸常甲仗衛從恩待次豫章王疑其年給油絡車隆昌元年俄遷侍中驃騎將軍開府儀同三司領兵置佐桂陽王鑠太祖第八子性清羸有冷疾嘗枕卧世祖臨

視賜床帳衾褥

始興簡王鑑太祖第十子永明九年進為散騎常侍領石頭戍事世祖以與鑑久別車駕幸石頭宴會賞賜

竟陵王子良武帝第二子建元二年為丹陽尹制東宮官僚以下致敬子良永明元年徙為侍中都督南兖兖徐青冀五州征北將軍南兖州刺史持節如故給油絡車明年入為護軍將軍兼司徒領兵置佐侍中如故鎮西州三年給鼓吹一部四年進號車騎將軍五年進位司

徒給班劍二十人至八年給與三望車及鬱林即位進位太傅增班劍三十人隆昌元年加殊禮劍履上殿入朝不趨贊拜不名其年薨鬱林嘗慮子良有異志及薨甚悅詔給東園溫明秘器歛以袞冕之服東府施喪位大鴻臚持節監護太官朝夕送祭又遣追崇假黃鉞侍中都督中外諸軍事太宰領大將軍揚州牧綠綬綬備九服錫命之禮使持節中書監王如故給九旒鸞輅黃屋左纛輜輳車前後部羽葆鼓吹挽歌虎賁班劍百人

葬禮依晉安平王孚故事

晉安王子懋武帝第七子永明十一年為使持節都督齊梁等四州二郡諸軍事征北將軍雍州刺史給鼓吹一部豫章王喪服未畢帝以邊州須威望許得奏之

隋郡王子隆武帝第八子帝以子隆能屬文謂王儉曰我家東阿也儉曰東阿重出實為皇家藩屏永明八年為使持節都督六州諸軍事荊州刺史給鼓吹一部

南康王子琳武帝子以母寵故最見愛太尉王儉因請

婚武帝悅而許之諷羣臣奉寶物名好盡直數百金武帝為之報荅如此及應封而好郡已盡乃以宣城封之既而以宣城屬揚州不欲為王國改封南康公褚綦為巴東公以南康為王國封子琳

新吳侯景先太祖從子也武帝即位為侍中領左軍將軍尋兼領軍將軍景先事帝盡心故恩寵特密初西還帝坐景陽樓台景先語故舊惟豫章王一人在席而已轉中領軍車駕射雉郊外行游景先常甲仗從廡察左

右永明五年為征虜將軍丹陽尹摠率步騎屯義陽遇疾卒帝傷惜之詔曰西信適至景先奄至喪逝悲懷切割不能自勝今便舉哀賻錢十萬布二百疋景先喪還詔曰新吳侯景先器懷開亮幹局通敏綢繆少長義兼勲戚誠著夷險績茂所司方升寵榮用仲任寄奄至喪逝悲痛良深贈侍中征北將軍南徐州刺史給鼓吹一部假節鉞侯如故謚曰忠侯

南豐伯赤斧太祖從祖弟也世祖親遇與蕭景先相比

及卒無儲積無絹為衾帝聞之愈惋惜詔賻錢五萬上
材一具布百疋蠟二百斤追贈金紫光祿大夫謚曰懿
伯子穎胄起家秘書郎太祖謂赤斧曰穎胄輕朱被身
覺其趨進轉美足慰人意遭父喪感脚疾數年然後能行
世祖有詔慰勉賜醫藥穎胄好文弟穎基好武世祖登
烽火樓詔賦詩合旨帝曰卿文弟武宗室便不乏才明
帝廢立賜穎胄以常所乘白犢牛中興元年為侍中尚書
令監八州軍事行荊州刺史及卒和帝出臨詔賜侍中

丞相本官如故前後部羽葆鼓吹班劍三十人輜輶車
黃屋左纛

曲江縣公遙光太祖兄衡陽元王道度子明帝初即位
誅賞諸事唯遙光共謀議建武二年進號撫軍將軍加
散騎常侍給通幟車鼓吹後加侍中中書令給仗永元
元年給班劍二十人即本號開府儀同三司豐城縣公
遙昌遙光弟也建武中官至征虜將軍豫州刺史永泰
元年卒帝愛遙昌兄弟如子甚痛惜之贈車騎將軍儀

同三司帝以問徐孝嗣孝嗣曰豐城本資尚輕贈以班
台如為小過帝曰卿乃欲存萬代準則此我兄孤子不
得與計

南郡王昭業文惠太子長子永明七年有司奏給班劍
二十人鼓吹一部高選友學十一年給皂輪三望車詔
高選國官

巴陵王寶義明帝長子為南徐州刺史東昏即位進征
北大將軍開府儀同三司給仗永元元年給班劍二十

人

梁長沙王業武帝長兄懿之子也仕齊至侍中尚書令
征虜將軍為東昏侯所害和帝中興元年追贈侍中中
書監司徒太后臨朝改贈太傅天監元年追崇丞相王
爵給九旒鸞輅輜輶車黃屋左纛前後部羽葆鼓吹挽
歌二部虎賁班劍百人一依晉安平王故事

臨川靖惠王宏太祖第六子天監元年為後軍將軍揚
州刺史又給鼓吹一部普通七年三月以疾累表自陳詔許

解揚州餘如故四月薨自疾至於薨輿駕七出臨視及
葬詔曰侍中太尉臨川王宏器宇冲貴雅量弘通爰初
弱齡行彰素履逮于應務嘉猷載緝自皇業起基地惟
介弟乂司神甸歷位台階論道登朝物無異議朕友于
之至家國兼情方弘變贊儀刑列辟天不憖遺奄焉弗
永哀痛抽切震慟于厥心宜增峻禮秩式昭懋典可贈
侍中大將軍揚州牧假黃鉞王如故并給羽葆鼓吹一
部增班劍為六十人給温明秘器欵以衮服

安成康王秀太祖第七子天監五年以右將軍加領軍中書令給鼓吹一部十六年為雍州刺史寧蠻校尉十七年薨高祖聞之甚痛惜遣皇子南康王績緣道迎候南平元襄王偉太祖第八子齊和帝以為雍州刺史寧蠻校尉天監元年進督荆寧二州俄給鼓吹一部十三年改為左光祿大夫加親信四十人歲給米萬斛布絹五千匹藥直二百四十萬厨供月二十萬并二衛兩營雜役二百人先置防閣白直左右職局一百人偉末年

疾浸劇不復出藩故俸秩加焉大通四年遷中書令大
司馬五年薨詔斂以袞冕給東園秘噐又詔曰旌德紀
功前王令典慎終追遠列代通規故侍中中書令
大司馬南平王偉噐宇宏曠監識弘簡爰在弱齡清風
載穆翼佐草昧勲高契汚契閣艱難劬勞任寄及贊務
論道弘茲袞職奄馬薨逝朕用震慟于厥心宜降寵命
式昭茂典可贈侍中太宰王如故給羽葆鼓吹一部并
班劍四十人

鄱陽忠烈王恢太祖第九子天監十一年為平西將軍
荊州刺史給鼓吹一部十七年為侍中普通五年進號驃
騎大將軍七年九月薨于州詔曰故使持節散騎常侍
都督荆湘雍涼益寧南北秦八州諸軍事驃騎大將軍
開府儀同三司荊州刺史鄱陽王恢風度開朗器情凝
質爰在弱歲美譽克宣洎于從政嘉猷載緝方入政論
道弘燮台階奄焉薨逝朕用傷悼于厥心宜隆寵命以
申朝典可贈侍中司徒遣中書舍人劉顯護喪事

始興忠武王愔太祖第十一子天監初為平西將軍荊州
刺史三年加鼓吹一部十四年遷鎮右將軍荊州刺史
十八年徵為侍中中撫將軍開府儀同三司領軍將軍
普通三年十一月薨追贈侍中司徒驃騎將軍給班劍
三十人羽葆鼓吹一部冊曰咨故侍中司徒驃騎將軍
始興王夫忠為令德武謂止戈于以用之載在前志王
有佐命之元勳利民之厚德契闊二紀終始不渝是用
方軌往賢稽擇故訓鴻名美義允臻其極今遣大鴻臚

程爽謚曰忠武魂而有靈歆茲顯號嗚呼哀哉

西昌侯藻長沙王懿之子大通三年為中將軍太子詹事出為丹陽尹高祖每嘆曰子弟並如迦葉吾復何憂
迦葉者藻之小名也

吳平侯景高祖從父弟天監初為冠軍將軍南兗州刺史詔景母毛氏為國太夫人禮如王國太妃假金章紫綬十三年又徵為鎮軍將軍直殿省知十州損益事月加祿五萬十九年為安西將軍郢州刺史將發高祖幸建

興苑餞別為之流涕既還宮詔給鼓吹一部

廬陵威王續高祖第五子中大通二年為雍州刺史南蠻校尉平北將軍給鼓吹一部

邵陵雋王綸高祖第六子普通七年拜侍中大通元年加信威將軍置佐史

武陵王紀高祖第八子授揚州刺史中書詔成武帝加四句曰貞白儉素是其清也臨財能讓是其廉也知法不犯是其慎也庶事無留是其勤也紀特為帝所愛

南郡王大連簡文帝大同十年高祖幸朱方與兄大臨並從高祖各給馬試之俱得馳驟之節高祖大悅他日謂太宗曰昨見大臨大連風韻可愛足以慰吾老年

忠壯世子方等元帝長子也征河東王溺死世祖後追思其才贈侍中中軍將軍揚州刺史為招魂以哀之

陳永修侯擬高祖疎屬也文帝即位為丹陽尹天嘉元年卒贈領軍將軍凶事所須並官資給二年配饗高祖廟廷

宜黃侯慧紀高祖之從孫也至德二年遷雲麾將軍荆
州刺史賜女妓一部

南康愍王曇朗高祖母弟忠壯王休先子也曇朗為質
於齊為齊所害時與齊絕尚弗之知高祖踐阼猶以曇
朗襲封南康郡王奉忠壯王祀禮秩一同皇子天嘉二
年齊人結好方始知之世祖詔曰夫追遠慎終抑聞前
誥南康王曇朗明哲懋親藩維是屬入質北齊用紆時
難皇運肇興未獲旋反永言跂望日夜不忘齊使始至

凶問奄及追懷痛悼兼倍常情宜隆寵數以光常序可
贈侍中安東將軍開府儀同三司南徐州刺史謚曰愍
衡陽獻王昌高祖第六子荊州陷與高祖俱遷關右天
嘉元年乃得還百寮上表曰扞城之寄匪親勿居宜啟
服衡疑兼崇徽飾臣等參議請以為散騎常侍都督湘
州諸軍事驃騎將軍湘州刺史衡陽郡王加給皂輪三
望車後部鼓吹一部班劍二十人啓可奉行三月入境
詔令中書舍人緣道迎接丙子濟江于中流船壞以溺

薨柩至京師上親出臨哭乃下詔曰夫寵章所以嘉德
禮數所以崇親乃歷代之通規固前王之令典新除使
持節散騎常侍都督湘州諸軍事驃騎將軍湘州牧衡
陽王昌明哲在躬珪璋早秀孝敬內湛聰睿外宣梁季
艱虞宗社顛墜西京淪覆陷身闕隴及鼎業初基外藩
逆命聘問斯阻音介莫通睠彼機橋將隣烏白今者羣
公戮力多難廓清輕傳入郢無勞假道周朝敦其繼好
驂駕歸來欣此朝聞庶歡昏定報施徒語魯莫輔仁人

之云亡殄瘁斯在奄馬薨殞倍增傷悼津門之慟空在
桓岫之切不追靜言念之心馬如割宜隆懋典以協徽
猷可贈侍中假黃鉞都督中外諸軍事太宰揚州牧給
東園溫明秘器九旒鑿輅黃屋左纛虎賁班劍百人輜
輶車前後部羽葆鼓吹奠送之儀一依漢東平憲王齊
豫章文獻王故事仍遣大司空持節迎護喪事大鴻臚
副其羽衛殯送所須隨繇備辦

始興王伯茂文帝第二子帝篡位詔封始興王以奉昭

烈王道談祀時舊制諸王受封未加戎號者不置佐史
於是尚書八座奏曰夫增崇徽號飾表車服所以闡彰
厥德下變民望第二皇子新除始興王伯茂體自尊極
神姿明穎玉映騰辰蘭芬綺歲清暉美譽日茂月升道
鬱平河聲超袞植皇情追感聖性天深以本宗闕緒纂
承藩嗣雖珪社是膺而戎章未襲豈所以光崇睿哲寵
樹皇枝臣等參議宜加寧遠將軍置佐史詔曰可伯茂
聰敏好學謙恭下士又以太子母弟帝深愛之是時征

北軍人盜發晉却曇墓大獲晉右將軍王羲之書及諸名賢遺迹文帝以伯茂好古多以賜之

鄱陽王伯山文帝第三子帝深器之高祖時天下草創諸王受封儀注多闕及伯山受封帝欲重其事天嘉元年七月八座奏封伯山乃遣持節兼太宰蕭睿告于太廟王質告于大社十月帝臨軒冊命策訖令王公以下讌于王第

冊府元龜卷二百七十六